

四庫全書

集部

欽定四庫全書

集部

江湖長翁集卷

二十九
三十

詳校官庶吉士臣吳烜

主事臣呂雲棟覆勘

覆校官博士臣劉光第

校對官典簿臣劉景岳

謄錄監生臣徐敦

欽定四庫全書

江湖長翁集卷二十九

宋 陳造 撰

傳

蘄處士傳

蘄處士其始祖蓋大撓之別派母初娠乞名於撓撓曰
是將得吾之數而先乎人者故以先名之及長罷局方
正好潔而便靜喜縱橫泛交多可自王公庶人有好之
無不往往輒從容竟日至於閑逸奇寔之人掘穴嵌巖

棲遲之士尤與之昵往往定忘年之交先以有行自矜其實挾數以遊世機變警敏無與敵與之偶者莫不過為之防勞役其思慮若踈而忽輒有所失坐是亦有厭而遠之者其厚者弗悔也時黃帝經理天人披山通道功未竟而蚩尤氏旅拒於是有涿鹿之役號為多事萬機之暇時亦命先先進侍率漏下十餘刻未休左右媚其款狎以為言上曰為天下誠不可近小人如先何議且非是何以怡神而休其暇日眷遇不替然命之則往

弗常進也帝之僂也先不之知自斃以徇偕弓劍奠橋
山子孫甚夥而秋獨能世其家從而學必待其專心致
志乃既其術秋之苗裔散在夷夏皆以處士名秦漢而
下俗愈不淳處士之術愈售至於博塞泉賄必見命景
帝時七國反吳濞為戎首或曰前此其太子留長安死
非命濞蘊忿久矣處士有力焉孫氏吳時士大夫多從
之遊韋洪嗣者深疾之正衙彈之曰斬氏弊族也任數
以肆欺好勝而喜殺欲羸而置人於貧苟生而不恤人

之死迷而不反不惟氓隸而已士大夫亦為所惑臣不
曉其故今魏蜀未滅正策士効謀雄武用力之秋而一
近斬氏則置不動慮玩歲愒日士氣益沮願陛下奮發
睿斷屏之遠方不齒于中國而後二方可臣海內可一
矣上是其言下詔禁諭而不能絕是後人主亦或好之
宋孝明尤甚自以為莫逆於心者其實不然近臣之推
避盖面諛也處士之自出河間象氏沙苑馬氏因處士
而進皆得幸然不若處士之嬖云贊曰孟氏有言君子

之澤五世而斬議者以是論世蘄氏之先不聞其有大
功德若舜禹羲稷者子孫何其盛耶其交若無還與人
方圓以是有聲而韋洪嗣疾視之詆之不遺力豈亦古
所謂鄉原者乎佛老二氏至漢乃有之今乃蔓延浸漸
與吾道為盛衰雖以傳奕韓愈辨之力拒之果欲絕之
而反熾況先委質黃帝而以其身徇為中國著姓遠矣
吾宣聖又嘗舉之以誨羣居不知義者彼且藉口洪嗣
之言矻矻乎難入宜哉

無長叟傳

無長叟其先占籍解梁以郡為氏有名丹書改其姓虺氏因亡澤國子孫散處汙耶之鄉或曰有餘以不足名長以短而形是子風韻丰美無所短何長之足言故以無長目之叟始生也母卜之得坤之剝卜者曰是蓋全於地而剛外黃中而剝膚捐軀以徇人其墨者之徒歟為人郭索嬰姍健武好勇介而戈若可畏然人得近之無患也性喜霜而惡霧不隨俗為生常假穴以居如上

古時越子方懷報吳祥下之日進種蠡問計策意殊不
躊叟因饗人進見王薪臥膽茹累然也因問王曰王富
貴玉食無欲矣而臞瘁乃爾非以吳怨未報耶今所咨
非蠡則種二子外無得也豈捨是絕無可使者二子身
則越而遙計吳能使越治而不能使吳不彊臣之族大
半居吳願為內間潛耗其國待其民貧食艱王起而乘
之庶有功王曰善既吳稻告成叟之族一昔戕之剪焉
無闕

為病越子乘之吳大敗後果滅吳叟之

力居多越子既并吳甚重叟叟亦不以功自多國中自王而下小夫庶賤凡生齒之類咸供其求有味其風度而饗飫其道交口稱之曰自叟之來吾食必飽飲必醉叟固無不可蕭然傾坐正復藉糟含飴時爾尤得幸於王雖尚食或觴羣臣若內與后妃燕未始不侍左右近倖尚醫之徒勸王疏之未能也思有以傾其愛乃進東海薄氏虞句章江氏瑤石氏首王接之果大愛幸叟為性躁擾不能無望一日揖三子曰當越尚弱吳主盟中

夏舉宗為死間衡行莫禦使吳民無秋而越終以伯在
子乎在我乎三子曰唯子不觀天道乎四時迭更功成
者退掉臂赴市者匪莫而朝過是不留盼也何也盛必
有衰顯必有晦使子策勲之後悠然長往隨波江湖蹈
滄海而深潛五鼎厚味不足以浼子身名俱全不其賢
哉且夫三犧五牲牽以適廟被以綺繡薦以雕俎孰若
徜徉於曠莽之野今子貪附一寸之明而不思砧几之
可畏怙虎怒之氣而忘鳥喙之不可保也亦愚矣種留

而誅蠹去而壽近事之驗也子其何擇叟於是口咭味
湧不復措辭然終不能去而死今其子孫必以秋冬為
出處之候三子甚之亦懲其祖之失云贊曰吳起自伐
其功屈於田文蔡澤闕應侯之口而代之相位蓋長於
此者或短於彼普進退盛衰之機者曉之以理未有不
幡然悔也叟之於三子始焉憤如俄焉昭如抑亦物情
然爾聞之長老有乞郡江淮間者首問監郡無有又聞
叟之所居也欣然戒塗其籍甚衆口如此而竟不得保

其天年昔人甘五鼎烹豈叟之謂歟

贊

傳神自贊

酸寒之骨骭髀之面茲可以齊壽夭冥貴賤以我為我
是謂知止足以病處病是謂去健美求窮我者又將誰
怨

三睡圖贊

良苦良苦放顛放癡多言多語謾殺鄧山尊宿掃殘國

清塵土相逢共作一覺睡却是惺惺超佛祖

黃元亮畫像贊

粹而溫真而醇有邊幅無緇磷世目以靜者古所謂逸
民九原不可作矣冰峙鵠立脩然眼中孰知有庾公之
塵

徐子畫像

意必接辭而通道或交臂而孚我得之子其諸異乎了
然於寫影之間況乎桐君之傳免頴之餘是其器度之

漂蕭襟抱之恢疎必能眇睨乎紉袴子而亦不屑山澤之臞者歟

貓相乳贊

并序

吾友龔養正家二貓產七子同一棲一出則一留留者均乳之非其子則怒視或噬之貓之常也亦或噬其子焉今若是吾求所以致是者為之贊曰

狸其質人其識匪狸之識繫人其德二狸七雛彼出此居居則乳之其七一如惟子龔子賢譽所萃和氣有格

爰及殊類人苟友悌犬可致書家或仁孝鵲馴于除彼
乃謂小人絕望君子而擴戾不可以為遜順即今推之
吾敢信耶

銘

蟄室銘

自物觀物蟄則屈即道自觀蟄則安安為動機屈信之
基尺蠖應龍彼亦一時席戶甕牖劣可容膝如君魁磊
而蟄此室其詩之昌其操之剛松栢雨霜蚌胎含光孰

晤而語蝸緣蟲弔兒輩須之霆驚電曜

順齋銘

豐之文彊之質中不餒外不怵臞而腴虛以實超世表
寓此室繫其適匪以物有餘於不足之間是謂正吉

顏樂堂銘為友人胡良卿作

寧為集枯舒舒愉愉無寧金朱睢睢盱盱徇外者不足
自反者有餘志士抗志晞顏與徒惟子胡子脩然一堂
左圖右書有琴可絃有酒可壺浩歌長吟不知蟬冕之

為王公簞瓢之為臞儒有立者卓越宇宙而與之俱也

晦室銘為嚴文炳作

物之相形蓋以其對惟其有明是以有晦此韜其光彼
耀其芒瓦釜崇鼎自渠所命無中而表暴之皦皦達人
過目眇乎其小遺外而內養我昧昧玄鑰所觸浩乎其
沛子寓此室辱以名之揭日月者倚牆則麾世莫領此
宜莫省子誰印是心參寥疑始

鏡庵銘為明波主人仙師作

有鏡易塵有明易昏不器之器輝華日新仙師所寶非
無非有明何從生塵何從受宴坐一庵照映今古玉盤
珠瑩霜空月午形渫而光不如匣藏彼過用之洞察毫
芒大圓若缺大明若昧曰儒與釋異乎不異吾言贅矣
師一笑領豈惟為師亦以自警

尊已齋銘

眇乎吾身中全其天乃德乃藝可聖可賢彼惕于日或
昏于利惰焉凡庸肆焉悖戾隋和之寶藉而櫝諸康瓠

瓦缶培棄若無世怵乎人吾反吾身苟其已尊寧惟已
珍敬夫可願毋受所賤嚴其不為毋納所卑可無疊疊
而戒悠悠子如尊之毋取外求

王勉夫齋銘

逐物者邁然於巨細反已者安否之是計我求其本彼
役諸外一室尋咫尺天地之間盤薄容與如棲睫端王子
視之萬間不殊碣而迷則鱣鯨橫海祇以自困得所棲
則蚊蚋一睫晏然有餘軒裳典墳昂珍菽水言銘厥齋

諗夸毗子

箴

進學箴

勤則不匱廢以自逸而沉吾儒顧乃愒日雄也競辰侃也惜陰夫豈不懷汲之彌深羣書之傳所以為子政韋編之絕所以為孔聖或苟且餒聖賢猶病惟古巍巍勉將與同云胡弗思委身凡庸盍圖其枕起鷄未晨盍火其膏息須夜分資則敏銳毋恃所恃文則炳燭無足所

足細而富貴大而事業悠悠而圖北轅望越酬應焚絲
歲月崩湍我作此箴用諭燕安

偈

神居實師退院作偈留之

瞿曇住西域說法度羣生羣生所依怙目以不動尊惟
其不動故羣動皆攝受是時波旬種百千萬眷屬排根
摧毀辱蜂發雨矢集瞿曇如須彌蟬蛻如予何亦如太
虛空雲翳自變滅砥柱中驚波古今無少損不動而坐

勝妙力固如是子道已未法衲子沈世紛競為住院計
匪利即趨名就常不待招逐有棧豆戀實師住神居四
衆所歸向云何得歸向以師清修故雖為衆歸向不作
患失想翩然挈瓶錫去若釋嶠雲亦如箭彗弦勢若不
可挽自師掃積弊羣魔尚遺種瞿曇昔去世政以波旬
故師行不回首彼魔所願欲雖無未法病或昧不動意
請答四衆心請為神居地柅車折蜚錫山立鎮故棲須
彌自無恙太虛自空曠衝波汙汙去砥柱屹不知羣魔

今未勢殘雪行見現我心寂不動是瞿曇智力是子大法權我不為子道子道可槩舉庸酌四衆心為子說此偈瞿曇設住世與子同首肯

雜說

斃蜂說

蜂善螫人被螫痛終日不解稚孺遇之幾慙絕畏尤甚然逢之不皆被螫觸之則螫近其居則螫有入于窻陽迷其穴穴以出之不克遂斃之斃之釋然而當蓋是非

室間物不得不畏稚孺尤所畏吾不斃彼則彼將吾螫
祛之不能則斃之不顧以汝有斃之道焉小人銜鋒搖
毒性善螫與蜂同士君子畏而防之甚於畏蜂彼或肆
焉君子仆焉而吾民滋不堪世不無小人人亦不皆被
螫交而犯之則螫臨利害亦螫猶之觸蜂而與蜂居毒
寢延吾民猶之稚孺遇之必憊絕而大不堪而使之躡
要塗睨高位駸駸制人甚於蜂之窻間與人居辨訂培
擊逐而斃之不遺力可也彼非吾仇也而必逐之必斃

之蜂然者吾不斃汝將為汝螫非直自為計亦為稚孺計舜不去四凶孔不誅少正卯復辟而留三思何異仁於蜂必不仁於人

仆柳說

庭柳二幹相若一扶疎一蔚然甚茂人必譽茂者予亦愛之一日大風茂者仆焉扶疎者乃無患木之生以枝葉枝葉以幹幹以根枝葉盛矣而幹不勝仆之道也猶之人德行根也才幹也技藝威儀文辭進趨凡外之接

物應俗間而婉者皆枝葉也德行先而才後技藝威儀
文辭進趨又其後焉是不可無要不可勝諸本後者之
浮先者之矜然平安無事或可欺人使之譽已投之倥
偬顛沛敗矣是不猶柳之蔚然仆是風耶吾識之以自
警

處病說

治病有術處病有術治病屬之醫處病責諸已處病之
術所忌有三一曰諱治身猶國古者之為國諱亂乃亂

諱亡乃亡身猶是也吾已病顧乃畏人之知其病意人之幸吾病秘不語人至於一旦不可為矣是謂諱二曰忽羣蟻可以潰隄一蟻可以燎原病之生未有不自微而著既病矣猥曰是何足慮食啖嗜欲自若也或且曰吾有命凡可以已吾病皆置不省病安得而不劇是謂忽三曰疑人亦有過於畏而煩於慮者病未為害惴惴慄慄不可朝夕亦或可以甚其病故曰疑予聞病者坐疑而重其輕有矣未若困於諱且忽者之多也不幸而

病者去是三者而又必禁聲色省思慮絕悲忿驚憂以葆其和而需病之衰其次邀功於藥必也淡食禮曰甘受和白受采此與醫經不相關而其理可以推知也味勝則藥力薄淡茹則藏氣平藏氣既平砭劑乃功予能淡食家人見謂難能每不難之蓋揆之以理爾當進食惟古顏子之簞瓢曾子之併日食原子之藜羹彼之巍巍萬古師仰顧乃爾今之奇傑邁往之士槁處埃壘枵腹傲世者不一而足而吾必極口腹羶薌而後慊耶且

淡食而病已枯槁之日甚短而備味之日甚長小不能忍至於大不容不忍耶予臨食心此二者故常甘半菽而忘八珍雖然是處已病之說爾世固有無地受病之道惜予知之晚也岐伯曰聖人治未亂不治已亂治未病不治已病古之志士凡其薄滋味謹起居鵠視嗜欲寇防風邪皆所以治未病素問難經詳言之矣論語一書吾宣聖為未病之防甚至而人往往不能遵而守之也故病其曰君子蕩蕩曰何憂何懼曰智者不惑夫如

是心之戰掉恂慄氣之拂結鬱堙無有也病奚由致人
或病無乃反是歟至於日用易守者亦有愧焉者矣不
為酒困酒無量不及亂人多違之予亦不能敬遵之宜
其病魚餒肉敗不時失飪皆不食也肉不勝食氣人多
違之予亦或不能敬遵之宜其病居以聖訓矜言之而
此皆違之病將誰咎昔枚乘作七發讀之未始不興岌
岌殆哉之歎曰出輿入輦蹶痿之幾洞房清宮寒熱之
媒甘脆醇醲腐腸之藥蛾眉嬋娟伐性之斧謂之腐謂

之伐蓋信乎其腐而伐之也曰幾曰媒則亦甚微而不可不過為之防也意禹之非飲食侃之酒不越限君子進御有所和之議四姬無節皆所以為腐之伐之者之防佗流水戶樞之譬五禽之戲皆所以反清宮輿輦之惰也歟盍亦則象孔聖枚乘之言寶以為鑑用智於未病無或踰此矣東坡論養生引昔人之言五行顛倒術龍從火裏出五行不順行虎向水邊生且曰順者死之道逆者生之道也此僊者超舉之術予推之而得衛生

之理今是耳目鼻口與夫內而五藏人知順之而已故易死否
且病衛生者務逆之如腎好鹹吾過於鹹腎則適矣吾形
性何所益肺好辛吾過於辛肺則適矣吾形性久則憊肝心
脾亦然目欲色見美女子狎之之心油然于中人之情也而
志士君子泯是念非矯也設婉麗橫陳也抑而遠之者為是
乎即而從之者為益乎外而形內而藏貴逆而不欲順逆之
至僂者不遠降此猶可以康寧永年知逆之貴則淡食可
安也嗜欲可禁也思慮可捐也悲忿驚憂可泯也何病

之虞予幼多病晚乃粗知之噫求之桑榆者已較之置不求不猶優乎私優之樂以告人也故為之書

辨俗見

世俗遇冬而煖曰此冬行夏令春而涼曰行秋令其陋可笑士大夫或為此言所謂行令如正月布德和令二月脩闔扇四月始絺九月大飲烝之類是已春大飲烝則行秋令矣夏而伐木取竹箭則行冬令矣此雖不足辨恐吾子孫亦嘗此聊書之

文以變為法

作文之法備于六經學者矻矻他求何哉經於句法字律春秋嚴矣一字之變褒貶各有在如詩之每章互變而後體備而法嚴法嚴而後意足予讀東門之扮三章皆述陳之民化其上而遊蕩至中章則曰穀旦于差南方之原不績其麻市也娑娑與始末二章自同而異特為奇偉詩人所謂泣鬼神者邪月令世傳呂不韋所作每月始末立例為言不得不同其中未嘗不變其法至

食麥食稻穀事大同小異五月則曰農乃登黍是月也
天子乃以雛嘗黍羞以含桃先薦寢廟森嚴奇譎如此
屈子曰吉日兮辰良此其法也退之碑羅池廟曰春與
猿鳴兮秋鶴與飛此老多得先秦文法六一翁疑之非
是

文法

古人妙於文惟妙故健文有順而健有逆置而彌健遷
固多得此法必我也為漢患者必湯也今天下重足而

立側目而視必我也必湯也置之于上其語彌健而法
作文至此妙矣吳芮贊曰庶有以夫著于甲令而稱忠
也亦此法后山用之於詩獨無樽酒為君壽政使秋花
未肯黃

八卦由數起

律歷志自伏羲畫八卦由數起師古曰言萬物之數因
八卦而起陳子曰非也此數謂揲蓍算法爾易雖至妙
其起也則由數有數然後象而至理可索也象一象兩

七八九六之類是也

子穀拒黍

度所以度長短也本起黃鍾之長以子穀拒黍中者孟
康注子北方北方黑謂黑黍師古曰非也子穀猶言穀
子爾陳子曰二說皆未為得子穀謂種而可子之穀穀
之可子者不贏縮可以定長短多寡不腐敗可以等輕
重故度量之起皆以子穀而權稱亦用千二百黍子穀
之說蓋在於此

三屬之甲

魏氏武卒衣三屬之甲師古音之欲蘇林曰兕牟也盆
領也髀裩也如淳曰上身一髀裩一脛繳一凡三屬師
古是如說陳子曰屬當音之樹周禮函人為甲犀甲七
屬兕甲六屬合甲五屬鄭注謂上旅下旅扎續之數今
云三屬取其輕便可出奇取勝故曰日中而趨百里今
被重甲猶謂之全裝其斫營襲敵亦用輕兵亦屬之七
六五三謂歟

牛車為櫓

巫蠱事戾太子誅江充武帝賜丞相璽書曰捕斬反者自有賞罰以牛車為櫓師古曰櫓楫也遠與敵戰故以車為楫用自蔽也一說櫓望敵之樓陳子曰不然牛車以當衝突為櫓猶言安櫓也置楫車上禦矢也

江湖長翁集卷二十九

欽定四庫全書

江湖長翁集卷三十

宋 陳造 撰

文

偶吟

長翁貧自安拙自慰拙故不勞貧故無累普普貿貿閱
人間世玉不獻而全足國有役而掉臂冰釋夸跂之慕
灰死彊陽之氣然而嬉笑怒詈起宮羽音歌酒風煙辦
遊戲事是則全樂于天資養于地者也彼子子而名揭

揭而營將倚牆麾之豈容動其喙耶

酹淮文

長淮渾渾蕩蕩沸滴兮經楚被吳瀆之一兮匪河匪江天
豈以是限南北兮衛拱皇居神所職兮殺敵之衝師濟
其出兮皇皇聖筭包九域兮塞幽冀趾龍荒行有日兮
掀然臨流豈曰效楚囚弔湘屈兮盤盤鼎立習武庫手
掾筆兮燕然有石可繼勒兮繇繇祀典為神之報歆芬

必兮

壬寅十月十日同行葉三錫君子
劉宗元之二君命某酹之乃云

表盜文

陳子罷官吳門坐貧無廬百指纍然備官舍以居右連城闔其左通衢空曠僻處幽屏斷絕比鄰之區岑寂無人之境置孥營食漂然而比逮負擔之勞方休妻子之望已亟營營擾擾若不遑息陳子問其然其慙嘖嘖其意唧唧曰自公之出偷兒赴隙一之日穴吾壁四之日闕吾極僕驚婢寤已無留迹雖幸焉而無喪亦禡魄而震惕揆犯險而徒還豈來意之遽闌盍擇地而規

鄰須公歸而定遷陳子曰嘻抵冒之一再固盜之頑也有以甚其來繫誰之愆也悖而取雖義之蠹斬其予亦仁之殘也絲寒粟飢賢愚所資一貧為累彼我共之守之者罄其術以甚密何異取之者殫其力而不遺豈知夫外其身則其身存私其蓄則所蓄隳達者之徒其大無隅其見靡拘委吾形骸曾外物之不殊相彼凶戾同赤子之一初穽填而檻撤可以馴猘獮拊闕而去鍵可以却穿窬自其心而論之有其所有則予亦盜忘其可

忘則盜亦予況乎患起於用智疑生於多術高明之室
羣偷所集夫吾今者幸飽溫之不謀嗾僕奴之赤立彼
之來也蓋已瞢冒不審得諸外而昧其實寧不由高墉
大屋之為累乎今又警徼之彌增防閑之愈悉四植矛
戟九省扃鐃惴惴凜凜真若護寶庾而守金埒者宜其
窺之不釋而乘之愈急也獨不聞挈篋而趨蒙莊之誨
人裸刺外示陳平之全身匹夫罪也璧未去文豹取也
皮之存理則固然顧乃以無有為有不文為文則咎不

在彼而在汝曾慢藏之足云然則視盜而一之者德之
至表盜而示之者術之次今慮勞而形弊由兩者之俱
蔽儻欲其無患歟盍思所以反是仲歎季服敞怵愧悔
倒床甘寐罷警屏衛老稚俯仰帖帖無事

還鶴觀

長翁之居宛在澗適有草不鋤無雀可羅翩彼皓鶴來
自無何傍我槿籬啄我徑莎側殷鮮之丹頂揚漂蕭之
玄袂方刷羽而振迅欲遡風而凌厲童見棄而得主良

愜心以暫慰佇立凝情延頸悲鳴俯有粒而不睨寂無
人兮尚驚女既嫁而非夫倏悔心而潛萌繫胎禽之翔
集必芝田與瑤池胡失脚於雲衢受塵寰之攸羈崇臺
峻沼之間處之猶戾其性庠隘局陋之地得此寧其所
宜愍其失所歸乃故主言從隙地徐行郡圃錫而逮昔
驥之困鹽車復而喜俄珠之還合浦佐卿獲反於故居
華表漫訪乎新語汝來其始宜吾之鄙捨池籟之華潔
步小家之尋咫尺自我而言不幸乃爾孰何棲止潔粒清

水彼破琴之鼃夫與攘雞之饕子或搖其牙血刃腥几
乃吾是逢不其幸矣方汝來客其居促戚其棲偏側集
枯捨苑寧計之得吾挽其留稻粱是謀鷙猛是憂有繫
昧於虛明寧它日之休休今其云旋忘忿恚脫糾纏躡
空曠鳴風煙玉粒而清泉吾亦置營營捐拳拳冰釋夢
覺兩適而並賢紛紛萬殊莫適尸諸貴而王公賤為匹
夫夥若萬金細而錙銖認之者愬愬任之者愉愉影事
視之固不可必其已有又安可有其所無徇諸物則多

累求諸已則有餘吾可不泰然於既失之後慊然於儻
來之初凡孫若子吾無憾爾作還鶴觀有味其旨

房陵勸農文

誘而諭之曰勸國家寶農歲勸以仲春俾守令奉而行
之盛德意也爾房民有待於勸者吾不可不告房之水
地山泉灌注號為良田而車建之器略不知具今若壅
者壅之不可壅車建而既不惟山荒當減十五而平原
陸地皆可為秔秔之區房之原陸彌亘數百里而桑柘

絕少蠶事滅裂飼守繰織皆未得法端足狹燥絲綿席
暗無可取貴與其植他木不若多植桑柘每歲春辦為
四十日夙夜之勤繰織飼守求盡其技精其事將不止
溫煖取給亦可貸以自贍二者汝房民之急務宜取法
江浙之人夫淮漢之俗大抵畧同權守淮人也亦以農
起家每不自以淮俗為是而農器之製必訪諸浙耕者
蠶者亦取法於浙故農功日劬親舊之見從者日以給
足吾今樂以身所履者語汝而以待親舊之心望汝汝

其聽之外此則賦稅必務早輸輸後期一或追逮費將
十倍受笞于官何益母耽道釋母徇巫鬼凡吾所見耽
道釋必貧徇巫鬼必貧或誤其命非吉凶不得已母非
時聚飲非農隙母遨嬉聚飲多費遨嬉則子弟浮惰房
民未免此吾又舉以為勸汝其聽之歸與婦子兄弟鄰
里鄉黨即吾言思之或相率從之當漸享安富之利而
權守布宣勸課之責不愧于心吾與汝交有益豈不佳
哉汝其聽之母忽

定海勸農文

國家務農重穀凡張官蒞政無非勸課之意又命守令率歲二月出郊延父老諭以此意其望於爾甚切爾居海瀕服勞力田頻享富歲之樂今猶以勤農為爾勸不幾贅矣抑勤之外猶有可進者茲不容默夫常賦不可闕爾寧有不知而率憚於輸送致煩追逮或鞭扑加焉田業已所有而假它人戶籍出沒遮覆僥覲不敗露而卒不可掩毆詈閭訟以爭毫末墮棄耕耨糜耗裏囊是

皆積習已久迷未反者不可不痛自悛改夫官租未輸
官吏勞擾于上而里正長旁午于門酒食酬謝夫豈能
免或受杖而去不免於輸所損如何託名寄產已負刑
憲歲或出穀而人各有心終未必可保不忍小忿求伸
其氣而不免俛首下顏胥吏之前捐金求售恐其却之
所得幾何所喪多矣三者未去雖勤於農恐未能全享
勤農之利也爾今幸者以吾為非欺盡更舊習無撓官
法心閑無事畢力於農晏受豐登安富之樂而今亦得

少休憂勞不兩利而俱優歟爾父老訓誨子弟告諭鄉里無忽吾言

又

言當由中政貴不倦人無貴賤官無高卑率不外此令臨是邑已再見春蓋嘗遵用令典奉天子之意躬行阡陌酌酒治具以農事為汝勸其所以為農之利與夫習俗已久自貽其害者諄複言之未應遽忘今嗣豐之後復得延見父老皆非姑應故事而已也凡吾起于田間

身所更而見之審者悉以告汝蓋欲其違害而就利由
中之言冀汝聽從指日以須跂足而望者皆未甚副吾
意誨爾以常賦不可違而不盡輸以煩追逮者自若也
誨爾以隱寄不可為而立偽戶以興訟訴者猶昔也以
至訟鬪好勝費財妨時招敵而結怨最不可不忍尤切
切為汝誨而亦漠然如不聞也豈令德薄而政謬不足
以服人而使之從或者所言不切時而不足聽歟政與
德令當反求謂言之不切果非也汝雖未盡從令敢有

倦于此用是申告汝父老蓋理約則易遵意支則難從
令不欲多其說以滋汝惑其歸率子弟鄉閭思吾言副
吾意將見化成于下官不勞于上他日言民淳而易治
者首舉是邑而推原其自亦知令嘗有以教之而然此
所甚望也汝當明吾心

又

令到此三勞農矣丁寧苦口亦既一再非鬲上語汝輩
孚信邈視所未敢必而今者比之初來比屋之間農業

漸成訟牒稍稀誕謾粗減輸送頗應期約則是老令之言爾輩蓋亦樂從矣用申言其勤切之意去歲不雨數旬於理宜旱清泉無水利始憂其必且流離飢凍而穡事如願民在樂土清泉之民亦粗充腹初無流殍天於汝甚厚令亦竊其餘祐盍思所以答報天施答報之實宜益勤于農儉于家敬養父兄輯睦鄉里訟牒誕謾益悔其舊習輸送奉公益知謹畏羞為頑獷之俗同趣仁壽之域使凡觀風于上繼政于後者知老令訓曉而然

爾父老惠我不既厚矣哉毋忽

又代平江守王仲衡尚書

皇家分任守宰專意勸課歲二月俾之出郊延見父老
諭以農意守也敢不祇率汝父老前明聽守言吳門之
地最為膏腴穀粟之出全浙所賴去年之旱浙民苦之
而郡境獨豐鄰壤嗷嗷汝民嬉嬉雖曰雨澤不愆之故
其亦汝民勤農所致非歟勤農之利既已享于昔可不
勉于今其歸率汝鄰里勉汝子弟深其耕精其耘亟其

收昔歲之澇可戒也不可不培乃隄防去夏之旱可戒
也不可不浚乃渠陂利乃灌具知勤于農而是之不務
則害其所以為勤毋飲博毋侈靡毋鬪訟輸官欲先毋
以身試官府貸賁欲信毋以詐累鄉評苟反是雖勤無
益也守到任以來凡臨汝以鎮靜撫汝以寬慈不敢略
有苛擾則以身勸汝久矣今復勸之以言是皆聖天
子愛汝之意守不敢不遵奉者果如吾言汝等享溫飽
安佚之利守亦得以免曠瘼之譴以仰副九重之懷惻

顧不懿哉汝父老母忘守言

祝文

祀文宣王祝文

惟王天縱將聖心傳是道師範古今陶冶帝王世底治
安其原有自衣被天下盡物莫報

祀兗國公祀文

惟公受道聖師優入其域善則服膺仁則克己四代禮
樂畀付惟重道之固存萬代如見

祀鄒國公祝文

惟公術自孔氏聞知之深養氣知言其傳有本楊墨迹
熄儒不晦蝕衛道之功淑諸古文

祀勾芒神祝文

青帝司春神則其配發潛振滯無微不育熏為嘉生冀
迎嗣歲祀有常典吏敢不率

又

歲事惟新青帝尸之神其佐也厥功則茂鞭春令辰揭

虔嘉旨為嗣歲請守敢怠廢

又

惟春職生惟帝成化攸助贊理惟神庀司因時祇事國
有祀典徂歲之旱民既勞止屈指嗣歲以逭倒垂繫吏
之憂繫神之責恭陳潔蠲神其監之

祀風師祝文

惟神體巽披拂輔天發育成物之功載諸祀典致敬展
誠敢有不時矧惟徂歲常暘害稼故茲歲事寅薦蠲潔

為嗣歲請豈止應故事而已哉

祀雨師祝文

穀之生成雨則潤之雨之節調神則司之有餘不足皆
物之害時而需焉稼穡用滋脩儀嚴祀國有常典式陳
明薦神其茹之

祀雷神祝文

發潛振滯惟神庀司聲嘿以時歲乃弗沴爰陳蠲潔為
稼事請民亦勞止職神之憂

登極赦祀諸廟祀文

聖天子行堯之道受舜之託揖遜云初澤沛方內自明而幽祀典咸秩惟神有功郡民利賴惟舊侈上之賜所不當後薦誠祠下實惟帝命

明堂赦祀諸廟祝文

湛恩解霈徧暨幽明惟神默佑斯民有功社稷因時宗祀賚食弗遺玉音俯臨郡敢弗率

謝諸廟祝文

丙申

麥者穀之重民者神所庇也為穀而服勞者民率民而趨時者吏也麥以旱而病民無麥而飢雖吏之咎亦神之累也故無麥禾者春秋所譏而有功於民者禮經所祀也齋此心走羣祠蓋日日以冀也飄然雨雪殿臘而肇春掃氛沴也焦然者油油感然者欣欣有生意也解民倒垂遑吏曠瘼神之賜也修辭謁款以答殊休迎嗣歲也

社稷神祝文

常暘為沴民實病之田疇龜拆比屋怨咨奸和召戾吏
政致此斯民何辜坐須轉徙庀職民事神則吏同俾歲
之登繫神之功霈然一雨冀畢稼事惟吏與民均荷神
賜

秋祀諸廟祝文

經曰有功於民則祀之惟神血食此土人所怙賴今者
歲事豐穰民氣和豫物無疵癘繫神之休疇敢掠美萬
寶告秋式薦嘉旨用伸昭報郡敢或怠

又

惟神贊帝之化依人而行血食郡境吏民賴庇歲豐氣和實惟陰祐秋報之典守敢不虔

祀龍母祝文

惟神上承帝命血食名山誕有神龍澤潤率土震夙之慶郡民弗忘庸酌依嚮之心少陳奠獻之禮庶其陰臨錫以屢豐

又

惟神陰佑茲土血食自昔誕彌既月人所欽慶是薦蠲
潔用陳薄祭俾民樂康而歲登不懈于永久惟神之望
秋謝至德廟惠感夫人祝文

惟神生有卓行沒為明神郡人賴福爰自古昔歲事告
豐人以寧康昭報之儀用致涓潔

諸廟祈雨祝文

雨不時降農工告病某也持節一道復攝郡寄暢然不
寧徧走諸祠冀垂陰隲油雲急雨日蒙膏潤歲事有望

豈繫人力神況不貲敢忘昭報

林屋洞天請水祝文

某以天子之命兼攝郡事入夏以來常暘為沴民情
熬聖主旰食夫庶富千里仰寬顧憂某之職也旱勢有
加其敢寧居凡仙佛之居神龍之祠哀訴備至邈無感
通意者誠心未至政術失中有以奸和氣無以格幽冥
故歟計已窮矣時已迫矣及今得雨庶倖下熟過是已
矣惟龍威神赫然出入無有宅是靈湫福此一方茲復

請命于龍庶分此水用揭蠲潔仰冀哀憫郡民需以澍
雨歲事粗收民免轉徙則某之庀職龍之血食皆可無
愧

龍水祝文

比以旱故投誠于龍寅奉此水庸展控扣之意果蒙顧
歆信次即雨來日又雨今復大雨民以呼舞吏釋重負
神之威靈應祈如響更祈惠況調護雨暘卒茲穡事則
終始之施與民不忘

諸廟祈雪祝文

郡雖告豐猶多貧窶嗣歲之望不啻飢渴年華暮矣雪
未應期民則跼蹐守敢自安惟神依人而行受帝所命
矜恕羣情及時未春錫之瑞應蠲沴導和晏享屢豐迫
切之懇非神孰告

諸廟謝雪祝文

比以雨雪不時致禱于神轉首陰晦霰雪微集霽睨已
遽上下之心慊然未足去春尚遠神可愬然盈尺之瑞

佇解倒垂

諸廟祈雨祝文

時將徂夏雨不時需農功告病羣情焦然惟神陰臨此境民所依賴用走祠下為稼事請西成有無繫此數日伏願謁帝祈命鞭龍起伏俾我郡民晏享嗣歲之樂則職幽司明雨為無負

諸廟謝雨祝文

比以旱不敢避瀆神之譙爐熏未熄雨已蜚洒冀神終

惠為霖之利繼此不靳則斯民免流冗之虞遂豐裕之樂皆神之賜

諸廟祈晴祝文

稼事告終場功將興淫霖為害民用咨怨吏之與神憂民之憂顯幽不同其職則一止陰為晴神則能之吏為民請神必響答

龍池祈雨祝文

房州

吏政之繆致此旱暵夫復何言然龍之神靈宮此福地

民所以怙如慈父母吏民之情捨龍曷懇是用躬扣靈
湫伸控蟻螻之悃伏冀慈仁愍惻念郡民之窮窶恕假
守之弗逮施以大雨使畢稼事兩邑數萬口即今解倒
垂之憂繼此享溫飽之樂吏亦少殺其恥其敢辟再三
之瀆仰惟宏貸之仁毋惜一引手之勞副此翹企

龍堂祈雨祝文

龍之窟宅此地威靈顯著民所依怙今茲之旱捨龍孰
懇懇請屢矣其答如響然雨未霈然未則尋槁郡政之

悖有奸陰陽吏之過也民則何罪使至此極夏序將終
三兩日得大雨或餘中熟過是民必流亡吏且獲譴亦
恐龍之不容恕然也躬走祠下委誠歸命伏冀哀憐副
此欽企

散解龍廟祈雨祝文

是山之泉灌溉之利居郡十八而神則尸之郡民依神
何啻怙恃久無大雨泉流衰殺近雖應祈而遠邇聞見
之間多未沾洽澤枯涸福郡民自昔取必于龍茲用祇

謁祠下惟惻然動心申以三日之霖俾千里均被神休
吏亦陰荷貺施惟龍鑒念之

祭文

祭陳吳縣文

云云吾徒相望社燕秋鴻偶茲為寮神合意融情好之
膠固玷闕之彌縫譚諧之傾輸術業之磨礱斷金之義
彌久益隆甫病告之再旬歛泉夜之長終嗚呼哀哉才
難之歎古今則同君之製邑指麾告功蔑肯縈於遊刃

斲彫刊之成風凜凜黠胥熙熙良農謂將培萬里之風
背下九重之芝封曾天意之可度而今此涕之不知所
從也嗚呼哀哉孰如君之聽斷明而公乎孰如君之臨
蒞清而容乎孰如君之結友應物簡而情節而通乎痛
哉已矣埋玉有期抱恨何窮我酒既旨我看則豐君其
茹之鑒予衷些嗚呼哀哉尚饗

祭趙提刑文

惟公譽隆宗英德為吏師踐揚中外模楷當世曾襟之

軒豁猷為之敏劬圭璋特達于莫立斷結知九重儲望
多士謂當論思補袞柱石皇家而天不憖遺中道奄棄
嗚呼哀哉俗方嗜進恬不之怪而公山林長往之志蓋
自壯年黽勉小留其中之所存蕭然而不屑其於物也
則悅然而泛應亦既蘇罷瘵拯彫弊而清風高操芥睨
軒冕桁揚聲利邈眎埃壘之表足以起頽俗振士氣人
皆凜然知前輩之風流出處與世殊絕也況如某輩託
庇二天蓋非一日話言緒論歷歷在耳幽明永隔痛恨

如何一觴薦誠莫既攀慕嗚呼哀哉尚饗

祭趙節推孺人文

惟靈性懿而淑志恬以穆奉祀則敬御家惟肅生于望
族慶門是歸有子而秀得夫而才瞻彼女師貽我婦則
凡曰有家不顯惟式天畀其賢復奪其全躓于中途逝
不待年藏山而運神莫為力埋玉之嗟豈惟宗戚悼往
念存我心孔悲薦誠此觴靈其茹之

祭丁知縣文

悠悠生死如畫之夜理有未澈羨生怛化惟彼仁賢斯人所依欵焉去眼渠寧不悲嗚呼哀哉君罷瑚璉未薦清廟干莫小試隨用而效長洲繁叢周施沛然政優才敏儒其根源棒檄屑為以旨甘計勤已撫人略行曩志賢愚壽天理有逆施地下修文竟荒是非親顏孰怡民瘼孰恤為察之情矧膠投漆撫事悼亡有涕浪浪魂其不違歆此奠觴嗚呼哀哉

祭汪叔量文

彼良者玉載妙其隴有挺其材宜卽之工歆歆溫潤盖
世若公澗松兮榦梢雲荆璞兮氣吐虹曾不得備重鎮
於東序薦一柱於公宮況摧折而糜捐方迪吉而告凶
宜朋知之見聞驚此涕之無從嗚呼哀哉我則姻家契
合趣同眷三載之周旋發其節而啓蒙慶吾兒之附葩
得水清之婦翁消鄙吝之曩懷收著述之新功摻別袂
之一翻想音儀於鱗鴻楚水兮悠悠淮山兮崇崇千里
兮相望夢境兮與通我昔計行擬訪公而春容云亦辦

來省老哀之萍蓬宦遊拘纏予既阻西姻事營畫君不
果東曾蕉鹿之一寤痛明幽之異蹤嗚呼哀哉孰如公
之賞予真兮匪繆其恭孰如公之愛予子兮一係其衷
孰如公之純誠儼恪兮歲寒始終今焉已矣孰與之訂
出處而譚汚隆千里之遙兮薄酹是供楚水可塵兮淮
山可壑悵此恨之難窮尚饗

祭羅樞密文

嗚呼哀哉萬生芸芸天所司也鍾為仁賢民所資也壽

天之殊恍可疑也豈短長必有所制將聽自爾而無所
尸耶嗟嗟先生當世之師有國之基民之怙恃君子倚
毗其身存亡關時盛衰佇觀修程一旦及茲嗚呼哀哉
正學心傳公默會之宏材時須何適不宜泛幕蓮於江
城領英蕩於震維邦有元龜民賴母慈倏芝檢之催歸
方宣室之受釐肅肅朝行蔚為羽儀塗抹誥雅則帝綸
增輝銓敘官聯則臣工允釐適事變之非常人莫保其
闕睢幸元弼之調虞藉婉畫之贊裨蟄驚濤而席平捲

氛祲而天披投輔國於有北邙曾孫而垂衣帝曰惟公
副予疇咨本兵之地捨公其誰曾東蘊之未究奄波逝
而莫追嗚呼哀哉地闢天開繫今何時如伊必萊如臯
必夔屋必棟梁虧一則阡危人必四肢廢一則弗支有
如先生其壽止斯此所以吾君興慙遺之嘆而斯民深
殄瘁之悲也而況吾徒倚公挈攜是輓是推是噓是吹
培纖植以干霄風弱羽而雲蜚鱗翼攀附自昔是期竹
帛姓名今其庶幾曾是瞬息志願遽違彼蒼者天冥茫

莫窺福善禍淫豈其吾欺恨終天而無盡淚浪浪而綆
垂彼蒼者天知乎不知有看薦盤有酒注卮公一茹之
慰我夢思嗚呼哀哉

祭石湖先生文

於偉先生斯道宗主斯文楷模外庸內勳倣睨龔黃臯
步益趨士蟻附之小大迄成如金在鑪文振哀玉筆奔
狂螭乃其緒餘一昨龍荒雍容口伐氣懾大胡公推上
仁天怒為霽南北免魚活億萬人壽當永延願止此歟

德人去來寔天所尸偶聖誕賢孝宗睿明公起作輔數
庸非天歲將流虹公則遊世實先期年及乘白雲復期
歲差帝後公先昔重堯華今參羣帝惟公周旋生榮死
哀實孚名白顧何歟然我歸自東恍隔顯幽情有弗宣
念昔杖屨日親色笑心銘話言薦旨此觴師資如在有
淚潁川

祭林子長右司文

堂堂如公世第一流其學粹醇其文炳彪其守之卓其

用之周其騷雅也今代之元劉其政術也前身之求由
郎省宰掾課效獨優西麾東節播之歡謳此其小試爾
矣終不得斟酌國論丹青帝猷然其脩然物表之志蓋
嘗拊楊軒裳一壑一丘其所以和歸來之章而新橫塘
之居也足以見其不惠不夷而傲晚公侯我輩從公許
以好修為禮則隆情則綢繆竭來周旋觴詠唱酬色笑
愛予熙然而春名理規警凜乎其秋日月以冀者踐丹
地踞黃閣而侍冕旒也汲引茹連固非所靳庶或偕坐

上客為羊河為劉侯為枚鄒嗚呼已矣但腸裂而胃抽
酌彼醪清侑此甘柔公其茹之慰我沉憂

高大卿哀辭

偉哉堂堂顓顓仰公時英哲兮具學遽詣其才超軼靡
或缺兮胃涵宏大氣陵高寒挺奇節兮孤介自守廉隅
凜峙耿玉雪兮皇曰咨女粲為使星炳卿月兮僑之遺
愛武之去思曷其竭兮奇抱陳陳百未一施俄中跌兮
中州餘運絲焚燎燼方騷屑兮天不慙遺即公巨帚掃

腥孽兮儼浯溪石嗣燕然碑垂不滅兮儲精蓄靈復幾
何時產此傑兮我曩即公聆堂下言薰猶別兮斷斷銅
墨煌煌旌纛望淮浙兮公騎鯨魚漂然閬蓬成永訣兮
有堂翬飛有子山立修佳謁兮撫事興懷老淚莫制鋸
霏屑兮慟為孟孫淚償唐瞿劍首映兮



江湖長翁集卷三十

欽定四庫全書

集部

江湖長翁集卷三十一

二

詳校官庶吉士臣吳烜

主事臣呂雲棟覆勘

覆校官博士臣劉光第

校對官典簿臣劉景岳

謄錄監生臣徐敦

欽定四庫全書

江湖長翁集卷三十一

宋 陳造 撰

題跋

題釣遊圖

風煙萬頃生涯一蓑修魚食以垂絲亂鷗羣而分波吏
曹縛虎如此樂何把玩是圖恍若鏡清深躡陂陀也

題石蘭圖

羌楚佩之可紉眇鄭夢之安取政使媚九畹之秋孰若

得一拳之友

跋郭元邁北中詩卷後

郭公忠烈士也方國步之艱請于朝使不測之敵畢命
絕漠羝未乳鴈不度隻影自顧與漢節偶政復鐵心石
腸恐不可一朝居而形于詩筆語工律嚴蕭散之趣邁
往之氣不可湮沒公忠烈士也所養又如此夫詩之道
深矣士以之索患難甘憂虞盖有助焉三百篇所載多
賤臣羈客幽憂無聊之辭而遭讒畏禍者之作皆悲不

失正怨不至怒刺譏其時而非誹也蓋其得於詩也深
故能安於無可柰何而為致命遂志之君子亦豈苟然
郭公之於詩蓋當求之古

題月谿辭後

梅花賦似非廣平語九辯招冤峻潔厲嚴宋玉之文蓋
不愧其師至賦神女則妍嫵妖蠱之態儼在人目士遊
戲翰墨情寓於辭不主故常乃妙爾吾宗夢錫公養高
行意傲睨人士若不可挹而拔之其文高古簡淡稱其

所為見于長短句則婉麗豐媾音諧字帖使人誦詠吟
玩若交五陵佳公子相與坐錦帳目蕙蘭而耳笙簫狎
興自生幽憂不留予然後知二宋公之隨作而工異乎
長彼短此者禮譏張而不弛而善戲謔兮詩人不去予
於月谿語亦云

跋龔判院罷邑質錢二帖

士有得於中其於應世桔槔仰俯虛舟泛浮我無心焉
然其冰蘖厲操一介不取自守嚴甚此數紙元亮歸去

來草魯公乞米帖也龔氏寶藏之

跋龔刊院詩集

龔養正幼則能詩文造物者困躓之詩文

闕

健渾

厚而鬢亦霜身且衰矣此集其先大夫判院

闕

所

著清峭奇麗句工字穩而老健渾厚信得之深且久者以是知吾養正之學有自判院公之多奇名位不躋士不滿于此而養正五十未祿謂治世果無遺才矣豈其然

書某氏辨誣錄後

理然而人不然之之謂誣即然不然而曉之之謂辨謂
夷惠汙謂仲尼佞是誣已若昔孟子著書而楊墨熄孔
道明辨之之力也至然其然不然其不然則固不可謂
之誣然乎不然而彊為之辨則欺矣某之在本朝窮凶
極惡流毒天下載之公論有不容掩後之言奸邪必稽
焉是固可謂之誣也乎非誣也而猥曰誣從而辨焉孝
子順孫之心其亦出於愛矣乎夫愛祖禰則有恩而是
非曲直則有義以私恩而撓公義其可疾也而出於愛

祖禰之心其亦可憐也夫聖賢君子不幸而祖禰如某
有之矣愛之固有道也舜之瞽瞍禹之鯀舜禹豈不愛其
父然不聞果於辨以自飾欺人而廢公義也周公告蔡
仲以蓋前人之愆曰惟忠惟孝邁迹自身蔡叔之惡極
矣聖人猶以為可蓋者繫仲也蓋之之說捨忠孝無他
術而蔡之綿祀始終春秋則仲之蓋前人至矣非自身
耶沈充之附王厚罪浮於哀章王偉勁也耻之雖耻之
未聞譏譏焉以不誣為誣也卒之甘死國難死于難其

足以贖乃祖之惡矣冀缺擣妻敬之甚晉用之而功夫
非芮宗耶士不幸為某之子孫者吾謂事上則如仲之
邁迹忠孝臨難當如勁之處死不避置未用如缺之不
忘敬孰曰不可夫何暇煩於言昔者敬宗之有遠也武
之有儒衡也義甫懷光之有湛與瓘也皆凶人之後無惡
也贅而辨則惡矣且某亦可悲也已甘取凶忍悖戾之
名不暇辭汲汲為富貴計為子孫地富貴則醺其欲而
其子孫至於含耻彊顏費辭犯嚴而萬一其言之售是

何工於為身而拙於謀子孫歟取快一已而貽禍無窮
不仁孰甚焉心之不自抑以計後世也而其為後世累
乃爾不智孰甚焉仁且智曾於某而責諸吾以諗仕而
計子孫者

跋郭太尉書李衛公問對

畫破堅陣夜接辭人上馬擊賊下馬草檄男子事業富
貴所自出者晉命帥必詩書禮樂之士元元本本夫豈
偶然予謁帥相郭公于揚州公一見延以代舍時接譚

辯凡古今治亂盛衰賢否去取蓋挺楹分一二數袞袞
不竭其名章俊語驚盪耳目猶置不論然則雍容而宗
祐安譚笑而勳庸隆進退出處世無間然有本者蓋如
是觀先太尉此帖其源流所自當求之摧鋒陷堅汗馬
執銳之表也家世之蟬聯忠孝之傳承功名之烜赫也
宜哉曷彛竹帛夫已累代寧復公慙卿卿慙長耶西平
有子聽復繼愬比郭氏尤貶況其餘

跋蔡武伯家藏尹和靖所書孝經

士何以探道曰尊經何以抗志曰慕古不經則他不古
則汙和靖尹公一代名士其尊經探道今者所宗孝經
十八章蓋其手書想平生六經之學著之心筆之紙不
一日廢不一二傳惜不盡見之是書流落而武伯能有
之時玩誦不忘武伯經術士孟子曰是以論其世是尚
友也武伯慕古之心世所謂則而象之者非耶

跋知安老人詩

士有傲世不仕胸次所有足以細物自重世不知而不

悔知安老人是也公四明人於書無所不讀緒餘詩章
猶頡頏名輩上讀此數紙蕭然塵外之姿在吾目中某
未識公而得公為人其子夢錫予畏友也故得盥手細
讀于吳門芹宮幸矣繼此拜床下獲聆其謦欬又幸也

題筆工俞生所藏書法

俞處士造筆精緻甲吳中俞頗能書理則然然餬口不
餘見古碑法書捐衣食求之不論價此亦奇嗜癖好未
可以常情計所蓄多善本此軸真蹟可寶士大夫願得

之者俞能有之予敢以市工例視之耶

題某人論史

讀經如拱侍夫子讀史如生乎其時目其治亂而與之
辨論者乃為善學閱此論千載向背是非瞭然心目間
學史者之法也某玩史有得甚多每為諸生講說漸成
編帙不得是正夫子臨帑愀然

書徐晉寧傳後

靖康之變終天之痛也向來釀毒挺談之人漂忽穢腐

使人言之而唾而劉韜李若水郭永之徒凜凜不死晉
寧於三子蓋伯仲間讀此傳如挹雄姿聽憂國料敵之
譚思九原之可作夫惡得而死之閱古今而論定君子
小人邪正之間天之予奪孰為優劣方公未被圍糾集
民丁十五萬為勤王之行議者講遽已使吾悟其謫公
得遲未可量也敵之謀我也一皆侯景故智景之舉逆
順衆寡不侔諸侯勤王則緩以講既罷則復進罷而起
我良難景易之梁憚戰倖休彼洞測之平侮之卒得逞

凡敵所以欺吾與吾所以受欺臺城之禍無少異而徐公之徒抱恨地下無終窮時端在此故吾併書之以諗謀國者庚申閏二月五日書于武林逆旅晉寧諱徽言題王勉夫雜說

吾友王勉夫經傳記注辨析凡三十卷其議論之純正稽考之精確鉤摘之博洽信可以不朽盍讀再過還之手抄家藏請俟異日

跋趙子野詩卷

予好詩世之詩人多與遊閱之多故人不與其能或與其知晚乃得趙子野詩讀之予敬且服焉清峻而豐腴麗雅而精粹其調度功力排奐頓挫沈著恢托詩所應有盡有之盖未易措評裁也歐公謂老泉吾賢孫石之文今於子意乃足予於子野亦云子野所學其源則三百篇其支流派引不杜子美不留昀也而其春秋甚富往往以李長吉為比長吉之作工矣然在子美一體爾子野將漁之不難昔人曰不恨臣無二王法恨二王無

臣法猶有為若言盍以是復之

跋簡齋帖

某從寺丞公遊獲觀簡齋先生進御三帖亦既跋以
短語而此帖蓋其與夫人書仲尼所謂如見大賓者邪
衛常精識吾猶得而間然冀缺敬心古不容於專美徒
勞稽首已後執鞭

跋沈子宿瀟湘連壁詩

荆公集他人句為詩工矣至丹陽葛先生又能為唐律

詩體尤工然未有專以坡谷二氏語兼舉互足而成成
無齟齬如沈君者千里歷塊孰若回策如縈者之為至
也余不識沈君意必清臞骨立如古辟穀混世仙子鶻
衣壁立無求於世者耶昔人謂詩窮人或且曰詩能達
人是一為簡齋發此語耳達一二窮乃十百千萬也沈
君於二老詩婉取工甚妙於詩不疑予固敬服而又憂
其窮未艾也世之軒輊士者能憂予所憂則窮達特未
定南卿兄姑待之

跋趙路分書予處病說後

予多病顧難死處之不悖也一貴人病予書所以處之
之說諗之後三日問之未過目也退自咎豈其言之繆
悠文之荒陋故爾見棄耶趙侯夷仲來高郵偶見之自
書以歸筆勢適媚無率遽態予年七十一矣食眠猶佳
何以致此夷仲六十三其膚貌充腴目光射人譚辯傾
注儀矩漂蕭如五十許人而所謂貴人者氣且奄奄即
之可憐則其於吾文去取輕重之間蓋不徒然也

跋趙路分書予詩文卷後

予為文寫意而已初不自是間示人亦有予之者然不自是之心未泯也趙侯夷仲江南之宗英妙於文者定交于淮南之高郵得予西遊藁取其詩賦雜說凡十四篇手寫而藏之噫猗和弗睨決非至寶良樂回眄未為下乘吾於是頗得自慰

題呂居仁詩

東萊呂居仁詩言從字順而其格律邁遠嚴密學者師

法也始余貧甚僅得建本熟讀心終不愜丙午主吳門
教印得此本尋舊書闕三之一以是知貧而學政自不
易力能得書不應遽忘云

題變離騷

歸來子之於楚騷古今源流正變之意備且盡矣山谷
曰設欲作錦當作錦機君子之於學取法以類如此是
書也蓋機之良取法者之不可一日缺然也然歸來子
泛然取必叙述所以作與所以取之意其又典重深粹

求之西漢司馬長卿劉子政其輩流歟王褒谷永之徒
猶當辟舍歸來子蘇門高第是書又學力既定之後耶
故予深所珍秘以此

題荀子

理以文為顯晦而其渾厚之氣嚴密之法至西漢始衰
西漢似未衰也校之先秦書有間矣雖謂之衰可也書
出乎秦之前六經之外惟孟荀理之寓乎文渾厚嚴密
與經表裏其他書言非不工然不自儒出故舛駁雜亂

過目之具爾習之則疵吾學荀子之書違道百一孟氏
之流歟楊雄固多愧況王通氏乎予窮經攻文也久知
玩是書而此本字大少差甚快老境姑齎其句讀藏示
子孫有未善未能以意斷者甚多此則有待焉

題長慶集

樂天人中龍其學粹詣其操守卓偉盡愛君憂人之心
而不害為放達超勝讀其遺文如挹清揚而親譚麈也
此板在平江公庫歲久漫滅予以意補葺之遂為嘉本

時與蒙莊宣公之書表裏誦之莫知其孰為優劣也

題六君子古文後

古不以文名而其文垂後邈不可及人非學而能何道
使然哉後之人有志於古必力學僅自立學雖力而不
至焉者皆是也古文衰于東京至唐韓柳則盛未幾復
衰至本朝歐公復盛起衰為盛非學力深至不能予
是焉學久未有愜于心乃取六君子文類而讀之如昌
黎之粹而古柳州之辨而古六一之渾厚而古河南之

簡切而古南豐之密而古后山之奇而古是皆可仰可
師集而參之肆吾力焉庶以逞吾志如諸公之墓誌表
尤奇筆然不勝其多又不容率意去取姑置之云

題東堂詞集

毛澤民集合文詩尺牘樂府為十五卷刊于嘉禾郡庫
予校文秋闈得是藏于家細觀靜閱其眎蘇氏之門秦
黃晁張陳李輩未遽輩行要為當時文士伯樂肯顧寧
復凡骨士之從事斯道當貴重之

題陸宣公集

孔孟栖栖旅人萬世師之屈于一時信于無窮聖賢往
往一揆陸宣公一代人傑其模畫經濟伐謀切機制物
務而洞人情王佐才也而文采論辨雄放不窮異世之
賈誼劉向歟德宗不得已而用棄若斷梗一時共事姦
儉如盧杞裴延齡之儔睨之執仇然不逐之殺之不快
也可謂不遇至本朝眉山公剡章上其奏議推尊之
甚至我壽皇聖帝又命邇寮分日進讀今日之幸視

昔之不幸不啻酬之蓋道不同肝膽楚越心契而道一
越宇宙殊古今猶同堂共處也壽皇後世虞舜而眉
山公孤忠與學輩公無忝者使兩公同立乾道淳熙之
間都俞拱揖足以挽回泰和之治不待推挽之勞謀斷
之須乃濟也予前後訪求公書皆不得善本淳熙己酉
考嘉禾試竣事郡侯以是責行紙薄厚得中而細緊潔
白字端謹適楷遂三讀而藏

題范蜀公奏議

蜀公景仁東坡之所敬畏迂叟歎慕以為不及者其愛
君憂國之心立朝經務之節槩見于此予校嘉禾秋闈
試得此書惜其多有漫滅妨讀誦俟求善本改正而藏
之

題東堂集

問牀頭之易了其非癡補射朋之缺驚其所能非定從
楚庭毛遂下客爾士不外示其抱負何如也毛澤民仕
臨安其守東坡坡士麟鳳也晚乃受知予讀東堂集玩

繹諷味其文之瓌艷充托其韻語之精深婉雅視秦黃
晁張盖不多愧比文宗學師不彼即而彼即之其賢於
世幾等此集嘉禾有板予己酉歲攷是郡秋試郡將趙
侯送似遂得寶藏之

題活人書

予為舉子時朱肱傷寒活人書愛而讀之百問十一卷
略能上口或曰治傷寒祖仲景是何為者予惑之後問
友人侯元英是書多稱仲景能無遺說乎曰是不惟於

仲景無遺說曲通傍暢凡傷寒書幾盡矣元英良醫人所服予所敬者然後知說者之妄愈益愛其書得是善本表裏六經課誦之并識之以詒子孫

題養老書

予幼則多病陷危屢矣自以為必死無生望今老矣多病自若然必死之念十減八九蓋不善用壯而善病也使推用病之見於用壯時康寧上壽有不足道諸子求得此書以吾老且病其為用益宏矣然其術中國所

傳彼固言之矣藥食好涼中土則宜用之東南當即此語審處之

題本草單方

一則專多則雜事物皆爾沉藥之用於病乎予幼多疾好窮藥性常用香附子用木賊用露蜂房皆一再驗其法盡載本草書人顧不熟讀之爾思欲會最擷攬以應須者未暇也不意此惠術有先之者是書板在四明予宰定海首得之列為三十五卷始于服餌終于婦人小

兒雜療法亦備矣然條分類別一閱可見益知異人世不乏才賢有識所在有之裝校藏秘不惟自衛旁濟禱其夙心而不假編集之勞晏享此利紹熙辛亥十一月朔書書之何志喜也

題程氏易傳

程氏之學與蘇氏角立通儒碩士不可偏廢予得蘇氏易傳又得是書緇繹閱誦多相發明予所謂不可偏廢者非然歟規得善本正其漫滅訛舛而藏之

題隋書

隋文乘時僥倖据有全周之業陳氏失德天復假手斃
之奄覆六合志得意滿以為萬世金城之固而無得於
君道不學而自任莫足固締天下之心惜不哲婦訂內
孽子蠱後詔燕維持之計索如也何能長有天下且若
是再傳而滅誠非不幸然其一代興置廢革與夫忠臣
義士謀謨著述之徒儒者不可不精攷以為法戒是書
八十五卷舊十七冊本在紹興予介察推汪公印得之

併為十一冊

題春秋名臣傳

春秋人才尚餘三代氣質然非左氏之文雄古嚴密亦孰能敷叙發揚如此其言與事隨編年而書君子欲其迹之本末可攷辭之連屬畢見或類而為之傳往往失之漏畧此書成於賢良王當不惟該備無遺而復引史記國語等書補苴彌縫之而終之以贊多出新見學者與經傳參讀既足以見當時人才出處語默之大槩抑

於著述體制所得將不貲予宰明之定海尚書羅公寄
惠此本字真紙佳真吾家之至寶也

題長慶集

樂天一代鉅儒讀天下書無遺而發諸其用其道自事
君行身即功揚名有餘裕矣會粹此書淑諸人法後世
偉哉可師仰也此本板在四明予印得之暇輒課數紙
振發舊聞之遺忘者其益不貲其間差誤亦改定一二
紙繁好壽百年未艾也子孫其寶之

題沈氏易小傳

諸家詁註易多矣有得必有失觀之者集取其德無惡也然未有得春秋衆賢用易者惟丞相沈公默探鈎取而發千八百餘年之遺意筆為小傳皆以春秋君子用易之說充而周之沿而求之源而流之遠哉妙矣是書也可不心醉焉蔡墨言龍而曰在乾之姤曰潛龍勿用初九變則姤也同人曰見龍在田九二變則同人大有曰飛龍在天九五變則大有坤曰見羣龍無首變而盡

則坤坤之剝曰龍戰于野坤上六之變也丞相之學其
本如此然其間猶不能無餘意遺義取之未盡求之小
差者又嘗潛心焉因而穿鑿其說則過矣亡友周令譽
卿授予一紙書乃春秋時戰法其法純用易而盡屏卜
筮家神將時日諸說周云上庠一士人出意用之占事
如神乃知讀古書可得古法思與不思爾沈公深得之
者予又知夫讀書不惟徒役心目而已

題孔叢子

吾夫子五經論語孟軻氏七篇與四時俱運日月儷明
可學不可議可窺不可窮其餘家語戴氏記禮雜以漢
儒之言非孔孟比學者精擇審取之其悖鮮矣孔叢子
又次二書然持論正守道嚴孔氏家法儼然在是自孔
氏者不可無此書是本字大而措少差誤可寶藏者蓋
傳之於四明公庫云

題孫先生春秋解

春秋經社吾鄉故中丞孫先生莘老與為之晚又為之

解其於經窮盡該備幾無遺意遍訪親舊客有以遺贈者遂為全書豈天為斯文地有物呵護歟何久睽而忽合也稍正其傳寫之誤而藏于家俾子孫知其不苟全得而易之昊天不宜

題孫公談圃

吾鄉當祖宗時名士輩出坐權臣訐究罹釁避禍多寂不聞世孫公一代偉人後無傳焉談圃所記無非植名義資見聞為益不貲如為言官時論張問呂公績事

其危言俗論此類必不一無從考其詳矣其詩法清麗
嚴密唐元白流亞亦不得全編讀之為吾輩師法公之
不幸如此然非劉公延世紀其緒餘以示久遠遂湮滅
不聞耶今檇李張公守吾鄉仰公風節持論大書鉅木
博其所傳以淑多士其道因二公粗見猶為幸可以慰
公九京矣

題南華真經

是書一已足今乃三因自笑其廉於世利而貪於書

題百一方

予少多病刻意方書且博求於人得於方書之外往往
取効如意歲丁巳之官京西正月十有八日謁漢陽使
君王公瑆公一見如舊知問為政不吾靳因惠百一選
方一部四裘予向之求而得用而效者盡在焉乃嘆得
書與識公皆不早也公云吾裒集十九年乃成書其勤
如是我輩顧安享用之士君子以仁存心凡其濟世利
人不能行慊如也公之此書足以醕滿所志而況政術

父母斯民有不可掩者在予皆不可忘故識之

題國語

左丘明傳紀諸國事既備矣復為國語二書之事大同
小異者多或疑之蓋傳在先秦古書六經之亞也紀史
以釋經文婉而麗國語要是傳體而其文壯其辭奇畢
萃于此學者表表讀之乃可吾家藏是書乃監本也句
而音之是書字尤大紙不惡尤可寶惜而制置袁公自
成都致房州見贈焉驀山絕壑凡四千里噫公之意厚

所遺物在此不在彼吾敢忘諸

題方舟集

蜀之文風自文翁始本朝東坡先生起于峨眉文章節
氣照映今古坡其文翁後身耶蜀人社稷文翁而天下
師尊東坡蓋無時而已也南度之後二李先生以興學
奇文名天下予來房州制置袁公以方舟集見寄始得
鹽誦熟閱之如拱侍文翁而承坡仙謦欬而瞠乎揮掃
時偉矣盛哉坡仙一代名師而當路欲殺之方舟亦起

輒顛頓不大施以死天之於二公徒予之名德而靳諸
榮利何歟豈斯文與富貴同意未易彼此輕重而不可
兼取之乎二公同時之人熏灼目前而寂寥身後或者
羞道之則天之意重此輕彼決也儒者觀吾言可無沈
嘆

題石次仲燒尾集

予昔官當塗讀石刻慊然也文乃宗教石次仲聞譽之
者不敢信蓋二十年矣次仲已死官房州制置常伯袁

公寄次仲此集并漢君臣歌細讀之與昔所閱若出兩
手何歟豈次仲得於文不若詩歟抑偶不工將既病乃
作之歟此集實有可觀然文終不優於詩決矣

題邵太史西山集

邵公濟博康節孫子文之子溥弟也其文章贍縟峻整
傑出南渡後晁以道嘗曰恨六一東坡不見子以道名
重一時非多可者設二文忠果見之其必置之蘇子美
毛法曹之間乎其於熙豐元祐用事臣涇渭去取正色

書之曾無依違使人增氣盛德後所立偉然天報之也
此書板在蜀予丞房陵制置常伯袁公惠五書此其一
公知我有好書癖致之不憚遠負以馬蓋綱卒也其勤
巨忘况吾之能好常伯之肯致子孫繼吾業歟皆宜念
且寶之

題家語

孔氏家法盡具論語矣家語雖雜以漢儒傳會悖理法
者少自孔氏惡可闕此蜀本紙佳字大蓋制置袁公所

賜去眼四十有八年迺今得而有之何念之深類鄴城之訪劍不索則獲幾象罔之得珠書以志喜云爾

題韻類坡詩

東坡仙伯之文韓歐伯仲其於詩邁往勁直之氣溢于言外而其嚴密腴麗清而不浮工而不露學者與子美表裏可也予幼則誦之上口者千餘篇中間局于科舉置不暇及蓋數年壯則仕仕不達連厄窮鄉官事小間得尋舊學創以韻類其詩為五策凡一千三百九十一

首於食飽散屐微吟長歌曳杖捫腹不惟玩繹磨礪其
規律而窮塗鼓吹蓋無以加此

題韻類詩史

學詩三百篇其祖也次楚辭是二經不于其辭于其意
意無有不道也杜子美古律詩實與之表裏予讀子美
詩能上口來房州多暇創以韻類之庶便歌誦成書矣
編之多舛不倫以予疾意草草亦更筆繆亂再整之善
是則子孫責予老且倦矣安知絕無如予者抑安知無

詹予者昔龐祐甫問詩法於東萊東萊問之曰子讀子
美詩乎能暗誦矣乎未也授以善本予方他之反將語
子請誦此既還復問則皆上口東萊遣之曰子自有師
矣龐自是以詩名孫仲益稱李師武誦子美古律詩十
卷不遺一字前輩尊信如此悠悠視之何也本朝東
坡黃陳其正派予亦韻類坡詩千三百篇并黃陳詩皆
能暗誦然詩學終愧古人又何也

題大易粹言

予學易始得東坡傳後有沈丞相小傳幾足矣今復得粹言其間載諸公所得深者叅舉而互備此板在舒州已就漫漶又遲之將不可讀予修之兩月餘為佳本是三書日在案樂則鼓吹富則封君又師其嚴且溫也其思嗣吾志哉

題七書

長孫原得官右列勢須習七書乃仕求于金州大將李公珪惠以此字楷紙厚可愛玩付床讀之予亦揩摩老

眼時誦一再過或命床誦臥聽之爾索之武略予求之
文法此書言從字順未易專以武事待之老泉先生以
孫吳簡切與遷固併論之亦是意已

題夏文莊

夏文莊公辭藻絢麗自其始學即含臺閣風骨老尤雄
健不衰當聖君貪才天下右文之時是不容不富貴
者而其所以富貴則不能不使予悲惜莊子以義命為
大戒士當後窮達先所守予求是書于鄂守鄭梟得以

藏于家使子孫寶之而又知予意故云

題孟浩然集後

孟浩然襄陽賢士當世名公猶欽慕之高懷清致使不能詩亦時楷式而是集所載謹格律於閑淡隱嚴密於紆餘不深於詩未必知之當時里人作浩然亭後更為孟亭謂賢人不可名按本傳孟浩然字浩然猶郭子儀字子儀彼恐人拘此故以名為字耶目以浩然亭無惡也祇示思賢之心易見爾而顧更之何歟慶元己未孟

秋九日鄂進士張君該惠此集舟中細閱因識之

題四時纂要書

不正而富苟焉而貧君子不予用是書未必遽富按圖從事十舉三四其不貧必矣不貧而義毋惡也然必以甲乙占驗冠于月始亦六經史漢備天人意耶於此而拘則害乃事讀之者謹之

題太倉稊米集

歲丙申予尉太平之繁昌客臧仲文自當塗訪予臧能

為詩而未已者頗尊信周少隱詩錄示數十篇要為得詩之法恨未盡讀也來襄陽帥許公以其全集贈行舟中無事藉以遮眼珍投也然詳讀其詩了知其楚人此固細事無之則尤佳爾

題策府元龜

博極羣書文史足用記亡書三篋寫五行志誰不樂此然人才不齊有不容彊士耻一事不知則類書未可忽也策府元龜一千卷章聖皇帝命為之以惠學者類

書莫詳焉自命下至大中祥符六年凡歷數載自王欽
若而下大小臣編摩校勘凡二十九人吾為儒思有之
凡四十餘年乃疇其志是書都大王公賜也自成都之
襄陽走三千里夫其成之久求之不易致之甚難東閣
不觀委之蠹魚鼠矢此非吾佳子孫也書以諗之

題衛生家寶方

予幼多病老且衰偶未死然亦以收方書故延視息至
今諸子以是為憂故凡方書聞見必求之必得之乃已

衛生一書尤為該備精密房之醫者李生有之遂傳其本一再用良驗其版乃南康軍何人家或曰遺火灰已久矣是寧可不傳尤不可不寶藏也

題宋百家詩

唐百家詩類以事此詩類以人比唐尤詳博人有能不能詩有工拙似不可以人彊取之曾公所編不必皆以詩名予猶惜之至金絲宮羽之雜奏金翠朱碧之相暉鏗鎗煥昡略無間斷噫富矣是書二十一冊六十一卷

蜀本也魏提幹南伯見惠

江湖長翁集卷三十一